

□ المعلم جمل □

وعندما أبديت استحسانى بالبن قال وهو يغمز بعينه :
- أما يكون مزاجك رايق ابقى تعالى اشرب معايا قهوة وتشرب لك
كمان نفسين حلوين ، معايا تعميرة مش موجودة في مصر كلها ..
نفسين اتنين منها أبرك من ميت نفس من غيرها .

وعندما أبديت له عدم تدخينى للحشيش ، قال باستهزاء :
- أنا مابحش اللغة دى بقى من غير مؤاخذة .. كلهم بيقولوا كده
وبعدين بيشرّبوا زى الحريقة .. وهو الحشيش عيب يا أستاذ .. كل
الوزراء بيحششوا من غير مؤاخذة ، والنائب بتاع الدائرة كان يشد
النفس يحرق الحجر من غير مؤاخذة .. وسعيد بك جنيدى اللي هو في
الإدارة العامة بتاع الاتحاد الاشتراكي حشاش أراى من غير
مؤاخذة.. عارفه والللا ؟

وعندما أبديت له أسفى لعدم معرفته ، قال :
- انت خايف من غير مؤاخذة ؟ .. خد بقى الخلاصة منى أنا ، عاوز
تمنع الحشيش من مصر ، خلى الجماعة الكبار دول بيطلوه.. ايه رأيك
في الخلاصة دى ؟

مرت أيام طويلة بعد ذلك والعلاقة بيننا تدور في حدود معينة،
حتى كان يوم أصابنى التهاب في الشعب ، وكان لايد من مضاد
حيوى قوى لوقف الالتهاب قبل أن يتحول إلى التهاب في الرئة . ولما
كانت صيدلية السجن.. يامولايأ كما خلقتنى ، سلفا وراوند وصبغة
يود وحقن بنسلين تكفى حقنة واحدة منها للقضاء على المريض .. كان
لايد من شراء الدواء من خارج السجن ، والدواء يحتاج إلى فلوس ،
والفلوس محرمة على نزيل السجو . لايد من الاتصال بالبيت لشراء
الدواء ، والاتصال ممنوع . ولكن المعلم جمل اقتحم زنزانتى وطلب
الروشته ، وبعد ساعات كان الدواء المطلوب في يدي .. كيف جاء
الدواء ؟ من الذى جاء به ؟ .. لم أعرف حتى خرجت من السجن .. المهم